

Inuusuttut angerlarsimaffiup avataanut inissinneqarsimasut 18-niit 21-inut ukioqalersimasut paarineqarallarsinnaanissaminnut inatsimmik tunngavilikkamik neqeroorfigineqarsinnaanissaasa qulakkeerneqarnissaa siunertaralugu, meeqqanik inuusuttunillu ikiorsiisarneq pillugu Inatsisartut peqqussutaata allanngortinneqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut .
(Inatsisartuni ilaasortaqa Olga P. Berthelsen, Inuit Ataqatigiit)

Akissuteqaat

(Isumaginninnermut Naalakkersuisoq)

Siullermeerneqarnera.

Olga P. Berthelsen Inuit Ataqatigiit aalajangigassatut siunnersuuteqarluni saqqummiussaqaqarmat Naalakkersuisuniit qujaffigerusupparput, siunnersuut eqqarsaatnik siunertanillu arlalinnik Naalakkersuisut isumaqatigisaannik imaqarmat.

Soorlu Olga P. Berthelsen siunnersuummini eqqaagaa, ullumikkut inatsisitigut suliniuteqareermermi malinnaaffigineqarnissamut tunngatillugu maleruagassaqaqareerpoq. Meeqqanik inuusuttunillu ikiorsiisarneq pillugu Inatsisartut peqqussutaat § 9 imm. 2 naapertorlugu kommunalbestyrelsit misissuissapput, ikiorsiissutit suut meeqqap pisariaqartitaanut tulluunnerunersut, tassungalu ilaatigut ilaavoq suliniuteqareermermi malinnaanisamut periarfissat.

Suliniuteqareermermi malinnaasinnaanerup qulakkiissavaa inuusuttut, assersuutigalugu ilaqtariinni paarsisartuni peroriartorsimasut, ilinniarnissaminnut tunngatillugu tapersersorneqarsinnaanerat, suliffimmik sungiusarfeqalersinnaanerat suliffittaarsinnaanerallu. Inuusuttullu taassuma saniatigut aamma pisariaqartissinnaavaat inunnet allanut atassuteqarnissaminnut tapersersorneqarnissartik aningaasanut tunngatillugu siunnersorneqarnissartik il.il. Taassuma kinguneranik suliniuteqareermermi malinnaaffigineqarsinnaaneq inunnet ataasiakkaanut suliniutaavoq, inuusuttut namminneq kissaataat pisariaqartitaallu naapertorlugit naliliinikkut aqqissuunneqarsimasoq.

Ilaqtariinni paarsisartuuneq pillugu Avannaamioqatigiinni Isumasioqatigiinnermi 2008-mi Nuummi pisumi nalunaarusiamut ilassutitut allatami atuarneqarsinnaavoq, inuusuttunik arlalinnik assersuutissaqartoq, ilaqtariit paarsisartut qimakkaangamikkit, imminnut isumagisinnaanngitsunik. Ilaatigut ilai ajornartorsiulersarput, ilinniagaqarnertik naammassisinnaanagu. Tamakkiisumik isigissagaanni meeqqat inuusuttullu amerlasuut ilaqtarinnut paarsisartunut inissinneqarsimasut inissinneqanngikkallaramilli innarlerneqarsimasarput, taassuma kinguneranik 18-nik ukioqalereeraluurlutik tapersersorneqarnissaminnik ikiorneqarnissaminnillu pisariaqartitsisarput. Meeqqat ulloq unnuarlu paaqqinnittarfimmiittut aamma taamatut inissisimasarput.

Taamaattumik Olga P. Berthelsen-ip siunnersuutaa aamma attuumassuteqarlunilu naleqquppoq. Meeqqanut inuusuttunullu inatsisiliornerup allanngornissaanut atatillugu suliniuteqareermermi malinnaasarneq misissuiffigilluarneqassaaq. Tamatuma isiginiarnerunissaa pisariaqarpoq, pisariaqarporlu inuit ilinniarsimasut attuumassuteqarsinnaasut kattuffiillu peqataatinnissaat, meeqqap pisariaqartitai aallaavigalugit inatsisiliorneqarnissamut qulakkeerinneqataasinnaammata.

Qulakkeersimassavarput inatsisiliornermi allannguusiagut suliareqqissaagaassasut meeqqamut iluaqutissanngorlugit. Taamaattumik meeqqanut inuusuttunullu tunngatillugu inatsisiliornermi

siunissamut qulakkeerinissap pisariaqartissavaa, sapinngisatsinnik nukiit annertuut piffissami sivilisunerusumi inatsisiliornermi sulinitinnut atortassagivut.

Inatsisiliap nutaap piareernissaanut Naalakkersuisut sulissutigissavaat, ullumikkut inatsisiliornermi periarfissat pitsaasumik atornissaat. Aningaasanut Inatsimmi kontomi pingaarnermi 30.01.03-mi aningaasaliissutit immikkoortinneqarput 2010-mi meeqqaanut inuusuttunullu tunngatillugu kommuunini sullissisut pikkorissarnissaannut. Pikkorissarnissat pilersaarusiordfigineqareerput, ilaatigullu paarineqarallarnissaq sammineqassalluni. Taassuma saniatigut Isumaginninnermut Naalakkersuisoqarfik atuagaaqqamik suliaqarniarpoq, sullissisunut suliniuteqareernermi malinnaasarnerup iluaqutaanik paasissutissiisussamik.

Naggataatigut erseqqissarusuppara Olga P. Berthelsen-ip siunnersuutaanut Naalakkersuisut tapersersuimmata. Siunissami aqquasaagassatsinnut unaminartunut inunnik nukittuunik pisariaqartitsivugut - uagullu qulakkeertariaqarparput, inuiaqatigiittut nukittuunik innuttaqarnissaq. Taamaammatt isumagisariaqarparput meeqqatta inussuttattalu pitsaanerpaanik periarfissaqarnissaat, alliarternerminnilu pitsaanerpaanik atugaqarnissaat.

Naalakkersuisut maannakkut misissuiffigilereerpaat eqqarsaatersuutigilereerlugulu qanoq iliornikkut inuusuttut najugaqatigiiffinnut neqeroorfigineqarsinnaanersut.

Naalakkersuisut 2011-ip tungaanut piffissaq ungasinnerusoq eqqarsaatigalugu tamakkiisumik meeqqanut inuusuttunullu tunngasuni iliuusissamik pilersaarusiussaaq, tassani isumaginninneq, peqqinnissaqarfik atuarfeqarnerlu ilanngunneqassallutik. Iliuusissamik pilersaarutit suliniutit katiterlugit nukittorsarlugillu aqqutissiussavai. Suliniutit ilagissavaat suliniuteqareernermi malinnaasarnermut tunngasut, taamaalilluni meeqqat pisinnaatitaaffiisa, periarfissaasa, alliarternermilu atugarisaasa malunnartumik nukittorsarneqarnissaat siunissami inuiaqatigiinni atugartuuni inooqataanissaannut.

Suliniuteqareernermi malinnaaffigineqartarneq meeqqanut inuusuttunullu tunngatillugu inatsisiliornissami aamma iliuusissamik pilersaarummut ataatsimoortumut ilaasussaanera pissutigalugu Naalakkersuisut inassutigaa siunnersuutit akuerineqarnissaa. Naalakkersuisut 2012-imi upernaakkut ataatsimiinnermi siunnersuummik nutaamik meeqqanut inuusuttunullu tunngasunik saqqummiuumaarlutik naatsorsuutigaat.